

D'Patte lo'ßen d'Bäm mech kucken,  
 soten all: mer dunn eist Bescht;  
 loß äis nach e we'neg brucken:  
 stäipe muß een all eis Äscht<sup>2</sup>.

D'Riewen hu mer och eng Seechen  
 niechterowend schuns verzieht  
 vun dem allerbeschte Greechen,  
 an de Wäi ge'f ouserwieht.

Looß se nach alt all gewährden!  
 Bauer, o dat get dir Fred.  
 Kuck, mat wäiße Wolkenherden<sup>3</sup>  
 Fihrt och d'Sonn nu schuns op d'Wed.

An den Himmel, kuck wi frendlech,  
 grad aß wann e schwätze ge'f!  
 Aß dir eppes<sup>4</sup>, so em 't möndlech,  
 well ech weeß, du baß em le'f.

Wells du Blumme, Ble'e, Blieder,  
 Fruucht an Uobst an d'Gras och gro'ß,  
 So em 't: O dat beschte Wieder  
 huet e jo fir dech am Scho'ß!

Ja du wers och net vergießen  
 fir deng Fra de Mäsch a Fimmel,  
 an de renge, feine Fließen  
 soll dir ble'e wi en Himmel.

An da mengen ech alt halwer  
 häß du gären och nach wuohl  
 sche' jong Fillen, löschtteg Kalwer  
 an da Lämmercher eng Zuohl<sup>5</sup>.

Halte-là! he! nu looß dat wueßen!  
 Well zum leschte häß du gär,  
 datt dir kaalwe sollen d'Ueßen<sup>6</sup>,  
 datt de Bauer ge'f en Här.